



Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Kalaallit Nunaanni ilisimatusarnernut tamanut ataatsimut qarasaasiami paasissutissanik katersivimmik pilersitsinissamik periarfissat misissorneqarnissaat pillugu Naalackersuisut peqquneqarnissaannik Inatsisartuni aalajangiiffigisassatut siunnersuut.

(Inatsisartunut ilaasortaq Mimi Karlsen, Inuit Ataqatigiit)

Tungavilersuut:

Kalaallit Nunaanni aamma Kalaallit Nunaat pillugu ilaatigut nammineq ilisimatusartutsinnik nunanillu allaneersunik ilisimatusarnernik ingerlatsisoqarpoq. Matumani inuiaqatigiilerinermi, peqqussutsimut, humanioramut kiisalu pinngortitalerineranut tamakku ilisimatusarnerusinnaapput.

Atorfillit politikerillu Kalaallit Nunaanni suliaqarfinni assigiinngitsuni ilisimatusarnernik toqqammaveqartumik ilisimasani ataatsimut paasisaqarnissamik pisariaqartitsikka juttarput.

Taamattaq ilinniagaqartut inaarutaasumik allagaqarnerminni Ph.d-ngornialluunniit ilisimatusaatigineqarsimasunut annertunerusumik paasisaqarnissamik pisariaqartitsisinnaasarput.

Kalaallit Nunaanni ilisimatusarnernit inernerit nassaarineqarsinnaapput, tamakkuli aatsaat ilinniarfiit suliffeqarfilluunniit suut inuillu kikkut attavigissallugit ilisimagaanni pisinnaasarpog. Tamannalu ajornannginnerusumik suliarineqarsinnaagunarpoq, taamaalillunilu atuisunut naggataagullu inuiaqatigiinnut tamanna iluaqutaassaaq.

Matumanilu qarasaasiakkut paasissutissanik katersivimmik pilersitsinissamut misissuinissaq siunnersuutigaara, immaqa nittartakkakkut qupperneq tamanit iserfigineqarsinnaasog, soqutiginnittullu paasisaqarfigisinnaasat aqutigalugu. Matumani nunatsinni ilisimasat ilisimatusarnernik toqqammaveqartut pigineqareersut ajornannginnerusumik pissarsiarineqarsinnaalernerisigut ilisimatusarnerup siammasinnerusumik sunniuteqarnissaa siunertaavoq. Taamaaliornikkut politikerit atorfilittallu tigussaannerusumik toqqammaveqarlutik sulisinaanissamut periarfissaqalissapput.

Ilinniartitaanernut Ilisimatusarnermullu Naalackersuisoqarfiup qarasaasiakkut paasissutissanik katersivimmik aqutsisinaanera allatut periarfissaavoq, naalackersuisoqarfinni ilinniarfinnut tamanut kiisalu ilisimatusarfinnut tamanut attaveqareerpoq.

INUIT ATAQATIGIIT

Inatsisartuni



Pisortanut aningaasatigut allaffissornikkullu kingunerisassai:

Qarasaasiakkut paasissutissanik katersivimmut periarfissamik misissuineq annerpaamik A/C-fuldmægtigip ukiup sisamararterutaanik, tassa 125.000 kr-inik naleqassasoq missingiunneqarpoq.

Namminersortunut aningaasaatigut allaffissornikkullu kingunerisassai:

Soqanngilaq.

Innuttaasunut aningaasatigut allaffissornikkullu kingunerisassai:

Soqanngilaq.